

САУДИЯ АРАБИСТОНИ КОМПАНИЯСИ ФАРГОНАДА МИСНИ ЧУҚУР ҚАЙТА ИШЛАШ ҲАМДА ЭЛЕКТР КАБЕЛЛАРИ ИШЛАБ ЧИҚАРИШ ЛОЙИХАЛАРИНИ АМАЛГА ОШИРАДИ

Вилоят ҳокими Хайрулло Бозоров бошчилигидаги Фарғона делегациясининг Қувайт ва Саудия Арабистонига амалий ташрифи давомида Жидда шаҳрида “Bahra Electrics” компанияси раҳбари Фаҳед Талал Идрис билан учрашув ўтказилиб, Фарғонада йирик ишлаб чиқариш инвестицион лойиҳасини амалга ошириш бўйича музокаралар олиб борилди.

2008 йилда Жидда шаҳрида “Bahra Cables” номи билан иш бошлаган компания, бугун “Bahra Electrics” номи остида электр компонентлари, кабель, ярим ўтказгичлар ва ускуналар ишлаб чиқарувчи йирик компанияга айланган. Йиллик 80 минг тонна мис, 45 минг тонна алюминийни қайта ишлаб, юқори қўшилган қийматли тайёр маҳсулотлар ишлаб чиқарилади.

Учрашувда вилоят ҳокими ушбу корхона имкониятларини юқори баҳолади, Ўзбекистонда арzon ва етарли хомашё мавжудлигини қайд этган Хайрулло Бозоров, юртимиздаги инвесторлар учун яратилган солиқ имтиёзлари, бозор имкониятлари, қўшни давлатларга логистика ва экспорт қулийликларига тўхталиб ўтди.

Вилоят ҳокими Туркиядан мис хомашёсини сотиб олаётганини қайд этган Фаҳед Талал Идрисга, Ўзбекистонда мис ишлаб чиқариш ҳажми юқори экани, Давлатимиз раҳбарининг соҳага алоҳида эътиборлари натижасида республикамизда мис хом ашёсини чуқур қайта ишлаш асосида юқори қўшилган қийматли тайёр маҳсулотлар ишлаб чиқариш қувватларини барпо этиш масаласига катта эътибор қаратилаётгани, бу йўналишда иш олиб бораётган тадбиркорлар ҳар томонлама қўллаб-қувватланаётганини билдириди.

Учрашувда Фарғона вилояти ҳокимлиги, “Bahra Electrics” компанияси ҳамда Қувайтнинг Energy Solutions компаниялари ўртасида вилоятимиз худудида мисни чуқур қайта ишлаш ҳамда электр кабеллари ишлаб чиқариш корхоналари ташкил этишни кўзда тутган англашув Меморандуми имзоланди.

Бу лойиҳаларни амалга ошириш учун қўшма ишчи гурӯҳ тузишга келишиб олинди.

Шу куни вилоят ҳокими Хайрулло Бозоров ота-боболари ўзбекистонлик бўлиб, Саудия Арабистонида яшаб келаётган, йирик бизнесга эга тадбиркорлар – Vision Ambassadors ҳамтаъсисчиси Осама Кокандий, Sodiq At-Tijoriya компанияси раҳбари Эмет Абдулазиз ҳамда араб ишбилармон Аҳмад Алхутами билан учрашди.

Осама Кокандий вилоят раҳбарига паррандачилик соҳасида Фарғонада лойиҳа амалга ошириш режаларини маълум қилди. Эмат Абдулазиз текстиль соҳасида ҳамкорлик қилиш, Фарғонада ишлаб чиқарилаётган маҳсулотларни Саудия Арабистони бозорига олиб киришда ўз таклифларини билдириди. Аҳмад Алхутами билан музокараларда эса тил ва турли касбларга ўқитиши марказлари ташкил этиш ҳамда 100 минг нафаргача фарғоналикларни Саудия Арабистонида доимий иш билан таъминлаш масаласи муҳокама қилинди.

Билдирилган таклифлар асосида ҳамкорликда ишни йўлга қўйиш, маълумотлар алмашиниш ва яқин муддатларда Фарғонада қайта учрашувлар ташкил қилинишига келишилди.

Фарғона вилояти делегацияси Қувайт ва Саудия Арабистони сафарини якунлаб, Фарғонага қайтиб келди.